



**Broj: 01-16/15**  
**Vareš, 28.01. 2015. godine**

Na osnovu člana 5. stav 4. Zakona o koncesijama („Službene novine Federacije BiH“ broj: 40/02 i 61/06) i članova 8. i 56. Zakona o principima lokalne samouprave (Sl. novine FBiH br. 61/06) člana 95. Statuta općine Vareš – Prečišćeni tekst, broj: 01-162/12 od 11.09.2012. godine, a u vezi sa članom 100. Poslovnika o radu Općinskog vijeća Vareš (prečišćeni tekst) br.01-109/09 od 29.04.2009. godine i 01-16/12 od 31.01.2012. godine, a postupajući po zahtjevu Ministarstva za poljoprivredu, šumarstvo i vodoprivredu Zeničko-dobojskog kantona br. 05-25-3243-11/14 od 22.12.2014. godine, Općinsko vijeće Vareš, na 25. sjednici održanoj 28.01. 2015. godine, d o n o s i:

## **ZAKLJUČAK**

### **I**

Daje se saglasnost za provođenje postupka dodjele koncesije za izgradnju malih hidroelektrana na rijeci Tribiji, općina Vareš, i to: MHE "Han Pobilje", MHE "Tribija" i MHE "Ušće".

Predmetni resurs –voda iz rijeke Tribija nema utvrđenu drugu namjenu niti javni interes da se koristi za druge potrebe te nema smetnji da se koristi za potrebe izgradnje malih hidroelektrana.

Takođe sa aspekta prostorno planske dokumentacije nema smetnji za izgradnju ovih mini hidroelektrana jer planirani tirolski vodozahvat obezbjeđuje biološki minimum i život u vodotoku niže vodozahvata.

### **II**

U svim aktivnostima dodjele koncesije i izrade koncesionog ugovora aktivno će biti uključena lokalna zajednica, a sve u skladu sa članom 56. Zakona o principima lokalne samouprave.

Ukoliko zahtjevi lokalne zajednice ne budu ispoštovani, zaključak će biti automatski stavljen van snage.

### **III**

Koncesionar koji u postupku javnog prikupljanja ponuda bude izabran kao najpovoljniji obavezan je prikupiti sve potrebne saglasnosti i dozvole prije potpisivanja koncesionog ugovora.

IV

Zaključak se dostavlja Ministarstva za poljoprivredu, šumarstvo i vodoprivredu Zeničko-dobojskog kantona na daljnje postupanje.

V

Ovaj Zaključak stupa na snagu danom donošenja.

**PREDSJEDAVAJUĆI  
OPĆINSKOG VIJEĆA**

**Zdravko Marošević**

**O b r a z l o ž e n j e**

Prema Programu utroška sredstava od koncesija za 2014. godinu, Ministarstvo za poljoprivredu, šumarstvo i vodoprivredu Zeničko-dobojskog kantona je naručilo izradu "Studije hidroenergetskog iskorištenja slivnog područja rijeke Tribije" za potencijalnu gradnju malih hidroelektrana do 5 MW. Studija je izrađena od strane "HIGRACON" d.o.o. Sarajevo, prema kojoj je na rijeci Tribiji moguća izgradnja sljedećih malih hidroelektrana: MHE "Han Pobilje", MHE "Tribija" i MHE "Ušće".

Ministarstvo za poljoprivredu, šumarstvo i vodoprivredu Zeničko-dobojskog kantona ima namjeru raspisati javni poziv za dodjelu koncesija za izgradnju navedenih objekata u skladu sa odredbama Zakona o koncesijama ("Službene novine Zeničko-dobojskog kantona" broj: 5/03), ali je dužno prije pokretanja postupka pribaviti saglasnost Općinskog Vijeća.

Stoga je nadležno ministarstvo uputilo dopis br. 05-25-3243-11/14 od 22.12.2014. godine na Općinsko vijeće i Općinskog načelnika u kojem se traži saglasnost za provođenje postupka dodjele koncesije za izgradnju malih hidroelektrana MHE "Han Pobilje", MHE "Tribija" i MHE "Ušće" na rijeci Tribiji, te je uz dopis dostavljena "Studija hidroenergetskog iskorištenja slivnog područja rijeke" urađena od strane "HIGRACON" d.o.o. Sarajevo.

Na osnovu člana 1. Zakona o dopunama zakona o koncesijama (Sl. novine FBiH br. 61/06) i članova 8. i 56. Zakona o principima lokalne samouprave (Sl. novine FBiH br. 61/06), Općinsko vijeće ima nadležnost da vrši politiku upravljanja prirodnim resursima i raspodjelu sredstava ostvarenih na osnovu njihovog korištenja na teritoriju koji je definisan općinskim granicama.

Uvidom u "Studiju hidroenergetskog iskorištenja slivnog područja rijeke Tribije" urađenu od strane "HIGRACON" d.o.o. Sarajevo konstatuje se da je moguća izgradnja tri male hidroelektrane na rijeci Tribiji (vodotok II kategorije), i to:

MHE "Han Pobilje", MHE "Tribija" i MHE "Ušće".

1. MHE "Han Pobilje"

Vodozahvat je lociran neposredno ispod ušća Dubokog potoka u rijeku Tribiju (stacionaža 9+392 km od ušća Tribije u rijeku Krivaju) na koti terena 650 m.n.m. Trasa cjevovoda dužine 2400 metara se pruža duž šumskog puta koji prati tok rijeke Tribije pa stoga nije potrebna izgradnja servisnog puta. Strojara je locirana na stacionaži 6+400 km na koti terena 591 m.n.m. cca 750 m uzvodno od ušća Vijačice u Tribiju.

Instalisana snaga je 241 kW.

2. MHE "Tribija"

Vodozahvat je lociran na stacionaži 4+460 km od ušća Tribije u rijeku Krivaju. Trasa cjevovoda dužine 2540 metara se pruža duž korita rijeke Tribije (vodni pojas). Strojara je smještena na lijevoj obali rijeke Tribije na koti terena 460 m.n.m. cca 1650 m uzvodno od ušća Tribije u Krivaju.

Instalisana snaga je 961 kW.

3. MHE "Ušće"

Vodozahvat se nalazi na stacionaži 1+600 km od ušća Tribije u Krivaju na koti terena 458 m.n.m., dok je strojara locirana na koti terena 413 m.n.m. neposredno prije ušća Tribije u rijeku Krivaju. Trasa cjevovoda dužine 1580 metara pruža se duž korita rijeke Tribije (vodni pojas).

Instalisana snaga je 434 kW.

Prema urađenoj "Studiji hidroenergetskog iskorištenja slivnog područja rijeke Tribije" izgradnja MHE ne zahtijeva korištenje velikih površina i nema bitan uticaj na izgled krajolika te navedeni objekti i rad MHE neće izazivati nepovoljne uticaje na okolinu.

Izgradnja MHE ima pozitivan uticaj na mogućnost daljnjeg razvoja općine kao i ostvarivanje prihoda od koncesije te se predlaže Općinskom vijeću da usvoji zaključak u predloženom obliku.

**PREDLAGAČ  
OPĆINSKI NAČELNIK**

**Avdija Kovačević, dipl. pravnik**